

1691

12^e fait in 12.

DISCOVRS

D'ESTAT ET

SALVTAIRE ADVIS

de la France Mourante.

M. DC. XXI.

DISCOVER


DESTROYED

NEWSPAPER
LIBRARY

Case
F
39
326

16218

M. DC. XXI



DISCOVRS D'ESTAT ET SALVTAIRE ADVIS DE LA France Mourante.

PAR quel bout reprendray-ie mes mortelles
doleances commencées depuis la moytié d'un
sicle, & d'auantage. Elles ont eu quelque peu
de relasche, plustost par deliberation & foibles-
se à ne les pouuoir exprimer, que par quelque def-
faut de sujet que i'en eusse. I'ay veu ma robbe tein-
te du sang de mes Enfans ; I'ay veu leur chair seruir
d'angrais à mes vastes campagnes, rendues par là fer-
tiles à ma desolation ; Veu qu'elles n'ont produict
leurs fruiçts pendant plusieurs années, que pour
nourrir les bourreaux de ma geniture, les auteurs
de mes confusions. I'ay veu raur la vie à mes Sacrez
Monarques, entre mes bras & dans mon sein, par
des Monstres sortis du centre des abismes, poussez à
ceste fureur par quelques noirs Demons, qui me tra-
uillent iusqu'à la mort depuis soixante années. Et
qui pis est, ma Religion à seruy de pretexte à tous
ces grands malheurs non comparables qu'à eux mes-
mes, les derniers aux premiers. I'ay veu ma Cou-
ronne à demy renuersée, par ceux là mesme qui en
deuoient estre les appuis. L'Estranger y à porté bien
auant ses pretentions, mes seruiteurs auançoient
leur main pour la prendre, haussioient leur teste pour
l'y loger. Je croyois que cela d'eust suffire pour me
rendre la plus desolée de toutes les Monarchies, Mais

l'ire du Ciel, comme ie voy, n'est encor satisfaicte de mes peines & n'a du tout vuidé contre moy, les phioles de ses vengeance. Il reste dans mes entrailles quelque malignes humeurs, qui me vont tantost ietter de nouvelles tranchées: dont les signes Pathognomoniques pour ma consolation plus grande, ne me promettent que la mort. Ce que i'ay eu de calme n'a esté que pour renouueller la vigueur de mon mal, auparauant affoibly à force de me combattre. Maintenant il vient armé de plus de violence, & me crains que ce sera avec beaucoup plus d'effect. Le sentiment que i'ay de la diminution de mes forces, la cognoissance de mes desastres passez, & des causes d'iceux, qui au lieu d'auoir diminué se sont multipliees; Espanchent mon ame en pleurs & me rendent avec raison la Cassandre de ma ruine, i'attendoy quelque secours de mes principaux membres; Mais ô malheur, la gangrenne & la pourriture me les gagnent l'un apres l'autre. Mes Ecclesiastiques sont perdus, & n'employe ce qu'ilz ont de vie mourante qu'à procurer ma mort; Ce sont autant d'estoilles d'influence maligne, tombees ia dés long temps du Ciel, pour desoler toute la terre. Leur langue est tout enfeu pour embraser mes villes plus florissantes, sans espargner les Palais de mes Princes, les Temples de mon Dieu, car tout y pend tout y va. Bergers deuoient ils estre pour assembler mon peuple sous la baniere d'un seul Sauueur, mais ils sont deuenus loups forcenez de rage; dispersans çà & là ceux qui entirent leurs dents cruelles. Au lieu d'ouurir la porte de vie conduisant droit les ames dans le seiour du Ciel, qu'ils ont de temps immemorial fermée de leurs mœurs, & de surcroist veulent y trauerser leurs

5
sanguinaires armes, ils ouurent l'huy de la mort pour y faire passer non moins ceux qui les suivent, que ceux que furieusement ils poursuivent. Ma Noblesse effrenée de vices n'a courage & vertu, qu'à s'entre-rauir poltronnement la vie; Plustost la verrez vous portée à miner & destruire ma panchante maison, qu'à l'appuyer & estançonner contre les ruynes qui la menacent. Ce sang tant genereux & noble du Cheualier sans Peur, des Nogarets & Colannes, n'eschauffe plus ces ames morfondues aux heroïques actions de leurs deuanciers, digne suiet aux siecles precedents de tant de belles histoires, que ceux de ce temps-cy ne peuuent lire qu'à leur honte. L'un captiue son ame dans le Chasteau saint Ange, par l'attente de quelque miette, qui tombe dans sa gueulle sous la table du Souuerain Pontife; Et n'est pas mesmes iusques à la Couronne de son Prince, dont il ne face litiere pour paruenir à ces fins. (Les derniers Estats genereux en pourroient dire des nouvelles.) L'autre adore le Soleil d'Espagne. Celuy cy presentes des sacrifices à la Lune de mon Soleil, qui pour les plus fauorables douceurs de ses influences ne peut donner que de la Luine. Et si Constantino-ple me voisinoit de si pres, que l'Italie ou l'Espagne. L'esperence d'un Turban de Bachat acquerroit dans c'est ordre, nombre de seruiteurs, au grand Seigneur de terres Orientales. Toute ma Iustice presque, est aux encheres, ses precieux ornements ne consistent plus qu'en robes & soutanes de draps de soye de grand prix; Sa balance n'est employée qu'à peser l'Or de la corruption, & son glaue ne sert plus qu'à punir les miserables, non ceux qui l'ont merité. Les Eschaffaux & les Gibets se vendent, ils ne se don-

ment plus ; Se vendent , dis-je d'une façon estrange , & contre la nature des Loix de toute Iustice commutative , car qui plus baille moins en reçoit. L'Or est par trop pesant , pour estre suspendu dedans les toilles d'une araignee , la vigne de Naboth à beaucoup d'enuieux ; A peine eschappera le Domaine que ie ne die la Couronne de mon Prince , la main de tant d'harpies , qui beent à gueullegloutte apres ceste riche & belle Pomme : Voire la deuorent en esperance. Et de tout cela ma Iustice en peinture ne s'en esmeut non plus , que s'il s'agissoit d'une neflle , ou de chose de moindre estime que le neant. Qui si vous ne conseruez le droict & les biens du Maistre qui vous nourrit & vous paye , au lieu de vous player de coups selon vos demerites ; qui croira que vous soyez ialoux de garantir le seruiteur pauvre & foible , de la violence oppression du puissant & du riche ?

Dans le sein de qui doncques verseray-ie mes larmes ? de quelles oreilles seront ouys mes cris ? de qui dois-je attendre secours & consolation en ces miennes anguisses ? puis que de trois Estats qui constituent mon estre , les deux entiers ou peu s'en faut , & plus de la moitié de l'autre sont sans force & vertu , sans passion & compassion de mes miseres , qui pis est les veritables causes de mes malheurs. Entreray-ie au cabinet de mon Prince. Et son Conseil d'Estat. Ie le tien voirement comme la quintessence de ces trois Ordres. Mais non toutesfois raffinez iusqu'au degré de perfection. Il si trouue encore des loppes , Beaucoup de terrestreité , (Tonnons nous pour ce coup dans ces limites ,) leurs conseils ne s'en ressentent que trop à mon tres-

grand defaduantage, & s'ils sortent à effect, à ma
perdition finale & ineuitable. Dictes moy de grace,
s'il n'y a pas de la subtilité à conseiller mon Prince,
d'appliquer des violents remedes sur vn corps dont
le poux bas & languide, n'a plus qu'un degré à des-
cendre pour rencentrer sa fin? Si ce n'est pas de gran-
de prudence, d'vser de la seignée en vne fièvre in-
termittante bilieuse, qui va reduire mon Estat en
tres-deplorable atrophie? En vn poinct voy-ie bien
que voulez pratiquer les preceptes de Medecine,
destinant la seignée aux membres sains, pour soula-
ger & guerir les malades. Mais vous deuiez auoir
apprins, qu'il n'en va pas en toutes choses du corps
des republiques, comme corps humain. En ce-
luy-cy la raison & l'vtilité rendent ceste maxime re-
commandable, au corps des Estats tout à rebours.

Ny la Iustice ny le bien public n'en peuuent per-
mettre l'vsage, l'innocent souffriroit-il bien iuste-
ment pour le coupable? Et perdant les membres
sains, si qu'il ne restat que malades. L'estat pour-
roit-il estre de duree? La longueur des iours aux
hommes & aux Monarchies, est vn guerdon de leur
iustice par la parole de Dieu. Iulien l'Apostat en son
Epistre à Calixene est contraint de le confesser.) *Le
temps seul, fait recognoistre l'homme iuste*) Les ef-
fects s'en lisent clairement au liure de la Nature:
Car les animaux nuisibles & cruels vivent fort peu,
les locustes pestes des arbres & de leurs fruiets:
voire de tut le verd qui tapisse le terre, ne sont pas
de durée; la Nature les estranglant par vn verd qui
leur n'aist à la gorge, si tost quelles ont engendré.

Ne voulant pas ceste iuste gouuernante, que
la mere & les enfans demeurent longuement en-

semble sur la terre, pour y faire tant de degast. Les loups à cause de leur cruauté, ne vivent pas longues années, ains vont mourans bien tost ou de faim ou de rage.

Je reuient à vous mes enfans (ainsi vous veu-x- ie appeller, ores que ne me traictiez en mere, puis que cherrhez à faire mourir mon iacob.) Dites moy ie vous prie quel-bien pretendez vous de mon mal? Quel profit du sang de vos freres? Si ie meurs me pourrez- vous suruiure, bien que le desiriez? Et. si vos freres sont par vous occis, estimez vous que ma caduque viellesse le puisse voir, sans y laisser avec vous & eux ma miserable vie? Je les ay portez comme vous en mon ventre. Les ay esleuez en mon sein. Les ay nourris de mon laict. I'ay eu à gré leur seruices, leur honneste conuersation dans le monde m'a iustement acquis le renom de mere heureuse, pour si loüable nourriture. Contentez-vous que i'ay esté cy-deuant tant & plus desolée par vos resolutions de pareille nature. Vous est-ce peu de m'auoir toute meurtrie, lors que ie m'opposois aux coups dont vous nauriez mortellement ces innocentes ames? Regardez mes ciatrices sans nombre, & le souuenir de vostre rage passée, vous seruira comme i'espere d'une forte camourre pour vous arrester à l'aduenir. Que si mes maux ne vous touchent, du moins soyez esmeus de ceux qui vous attendent. Le mauuais Conseil à cela de recommandable, qu'il paye d'ordinaire son autheur le premier par droict de recognoissance. L'espée, la peste & la famine, sont furie auégles qui ne regardent ou elles frappent. Le veloux & le drap d'or ne sont à preuue des coups mortels, qu'elles assenent sans discretion

cretion & difference. Qui ne cherche l'une les rencontre toutes trois; car elles vont le plus souuent de compagnie. Si vos riches Palais ne sont à preuue du feu, des marteaux, des haches, & de tout ce que peut la violence indomptable d'une multitude furieusement esmuë, ie ne vöy nulle apparence que les puissiez garentir, cuidez vous que vos femmes & vos filles pucelles, par priuilege special esuient les efforts du Soldat impudique, quand les autres seront violées? C'est vous chatoüiller, pour vous faire rire de le penser. Sçachez qu'ayans vne fois allumé le degastant flambeau de guerre ciuile dans mes entrailles, vous ny tout le reste des hommes ne sçauriez arrester la vitesse de ses flames, que vous & moy ne soyons reduits en cendre. Le suit vieille seiche & aride, peu de souffre me pourra faire espandre, mais estant esprise il n'y a suffisamment d'eau en la mer pour me pouuoir esteindre. L'embrasement de mon plus riche Palais ces annees passees, & de present celuy des Tuilleries ne vous en sont ils pas vn fatal & mal-encontreux presage?

Vous donc les humeurs & les noms se rencontrent par la transposition d'une seule syllabe, ie ne crain aussi que par quelque fatallité, le transport des bornes de mon Empire n'arriue sous vostre domination. Vos verds conseils m'auoient reduitte aux abois peut auoir trente annees: lors que mon Louure s'en alloit prendre le nom de l'escurial, & que Philippe Roy des Espagnes se preparoit des ja pour faire son entree de dans Paris sa bonne ville. Je sçay pourtant que vous estiez portez d'un bon zele, & que vous ne tendiez qu'à dignement faire recognoistre & honorer par mes enfans, le lieute-

tenant du Fils de Dieu en terre ; Qui desire encor
 autant que de viure , de fauoriser Louys son fils aî-
 né , del'honneur de Vassal du Saint Siege , & ainsi
 lesleuer au dessus du Roy de la Grande Bretagne , de
 celuy de Dannemarck & plusieurs autres , qui ne
 meritte pas de luy ceste grace celeste. Mais neant-
 moins ie me plaindray tousiours des maux que ie
 souffris a l'heure par vostre zele trop ardent , qui
 pour vne fois ma bien eschaudee.

Maintenant il vous manque subiect pour ampli-
 fier le liure de la Constance , mais vos resolutions
 dernieres aussi vigoureuses & verdes que les pre-
 miers , vous en fourniront fuffisamment. Car du
 verd vous aurez tantost fait du rouge , & la teste de
 l'vn de vous en est des-ja affublee par esperance ; ne
 doutant point d'ailieurs qu'il ne vous en reste assez
 pour tapiffer toutes mes villes , pour en couvrir tous
 mes enfans. En tous cas vous employez le noir
 quand le rouge n'y pourra atteindre , (afin que nul-
 le partie de mon corps ne soit exempte de vos mar-
 ques.) Aussi est-ce chose tres-aïsee de conuertir le
 rouge en noir es teintures superficielles , au lieu que
 le rouge est la fin de toutes es intrinseques & con-
 substantielles ; mais ie ne crain que la vostre ne soit
 de ceste derniere espece.

Mon Sylleri le Sage , oracle des bons François ,
 dont les conseils confits en prudence ne tiennent
 rien du verd , ie suis autant instruite qu'asseuree de
 vostre fidelle affection au seruice de mon Prince , &
 à mon propre bien. Si vos bons aduis ne sont pour-
 tant pesez , patience ; Ce n'est pas chose estran-
 ge que les ieunes preuallent en force & en vigueur
 par dessus la foible vieillesse. Les gouttes font mar-

cher d'ordinaire ceux-cy trop pesamment. Il est malaisé que les autres puissent s'accommoder a ce train de tortuë. Les ailles qui portent aux talons, & le feu de leur teste leur donnent des mouuemens plus vistes & plus celestes; Non toutes fois si assurez *bos lassus fortur figit pedem*. Partant ie vous conseille; mes enfans, de prendre mon Sylleri pour guide, qui vous rendra seurement en vos maisons & familles; Les autres ne tendent qu'à vous faire d'esuoyer, & vous abandonnans entre les mains cruelles des voleurs, vont rendre vos femmes sans marys, & tous vos enfans sans peres.

Mais encore faul-il que ie die vn mot à mon lanus, ie le voy tout pensif & en peine pour sçauoir laquelle de ses deux faces on l'obligera de tourner vers mes miseres. Je suis fort assuree qu'il ayme grandement la paix, & se contente des sacrifices que iournellement ie luy rends & huys clos dedans son temple; Il sçait que vaut l'aune d'vne guerre ciuille, & n'en veut plus achepter au pris qui coust. Il condamne les folies passees de tant plus quelles on esté trop longues, la memoire qu'il en a chagrine souvent sa viellese. C'est le ventre de sa mere il n'y rentrera iamais; Son plus grand desir gist à couller doucement le reste de sa vie. Et quoy que par le cours de nature, il ne puisse pas se la promettre fort longue; si ne veult-il pourtant que le glaue ou le fen luy en tranchent si tost la trame: Et ie luy conseille de se bien conseruer pour le seruice de mon Prince, auquel il est des plus vtils.

Or ça que i'abouche mon Parlement, lequel ie n'ay tantost compris dans la coulpe des autres; Parlement des Pairs & sans Pair, Colonne de l'E-

stat, Dieu tutelaire de la republique, ou se voyent
 autant de Catons qu'il y a de Presidents & de Con-
 seillers en ses Chambres. (Vn seul pourtant ex-
 cepté, dont les armoiries sont verdes, qui n'est la
 marque d'un bon & sage François (ô que vostre re-
 solution est genereuse, mes bien ayez nourrissons,
 ô que vos Arrests sont plains de Iustice. Qu'on
 trompast vostre Maistre & le mien, & que vous n'o-
 fassiez le dire? Qu'on le pillast visiblement, & que
 vostre robe seruit à cacher le pillage? Qu'on le por-
 tast à des violentes resolutions, qui ne peuuent estre
 que funestes, à luy, à vous, & à moy? & que cepen-
 dant la crainte liaist vos langues, ou la poussierre d'Or
 vous osblouist les yeux? C'est ce que ne verront ia-
 mais ceux qui le desirent avec passion, & le pour-
 chassent à outrance; Ennemis qu'ils sont de mon re-
 pos, ialoux de vostre loüange, & coniurez à ma ruy-
 ne. C'est à vous mes braues que compette à tres-
 bon tiltre le nom de Parlement, duquel la venera-
 ble antiquité vous à voulu honorer; Car vous par-
 lementez & grauement & iustement, non moins
 des affaires de la paix & de la guerre pour l'Estat, que
 de ceux de la Iustice pour les particulieres. Aussi
 vous appartient l'un & l'autre, par l'establissement
 que mes souuerains ont voulu faire de vostre ordre;
 Ou souuent ils se sont trouuez pour y presider eux
 mesmes, comme chefs d'un si auguste corps. Si l'es-
 carlatte, ornement magestueux de mes Princes,
 vous honore: Aussi respondes vous tres-dignement
 à c'est honneur, par le fidelle acquittement de vos
 charges tant releuees. Ce n'est point sans raison
 qu'en l'une de voz mains ie voy l'Espée, en l'autre la
 Balence; Car vous auez fort prudemment pesé,

qu'il n'est ny iuste n'y vtile, de sortir l'espee hors du fourreau, pour s'esgorger soy-mesme, comme desespererez; Ou se couper les membres l'un apres l'autre comme phrenetiques. Vous auez aussi bien balencé, que les dons immenses, & de sommes innombrables, tirez des coffres de mon Roy, par le mauvais mesnagement de ceux qui voysinent de plus pres sa personne, ne se pouuoient faire qu'à dessein d'affoiblir sa puissance: Rendue redoutable à ses ennemis par les seules finances, qui sont les nerfs de la guerre. Et puis charger, voire accabler de iour en iour mon pauvre peuple de nouveau subsides, pour estancher sa soif brullante, & assourir la faim gloutonne de quelques tantales, qui depuis plusieurs annees s'abreuuent de mon sang, se paissent de ma chair, & cassent mes os pour en auoir les moëllles; Cela peut-il continuer sans me perdre? Et sans esloigner le cœur de mes enfans, de l'amour du respect, & de la fidelité qu'ils doiuent à leur naturel Prince? Vous auez bien preueu que non, & par vostre Arrest auez pourueu à ce qu'à l'aduenir on ne liaist telles parties. C'est de tous temps, royales ames, que telles resolutions animent vostre courage, eschauffent vostre sang, lors qu'il s'agist de la manutention des droicts du souuerain, du salut de mon peuple, & du bien de c'est estat. L'histoire tesmoin non suspect des choses passees, en à eternisé les preuues, pour eterniser vostre los. L'Arrest de l'an soixante vn, contre Iean Tanquerel, soustenant quelque propositions heretiques & seditieuses, les excellentes remonstrances de l'an quatre vingt cinq, au Roy Henry III. sur les desordres de l'Estat, le peril de sa personne, l'oppression de ses subjects, & les attentats

du Saint Pere contre la Monarchie, avec tant d'autres actes signalez. Soit de ce temps là, & au dessus, soit des anneés dernieres contre Mariana, Bellarmín, Suarez, & autres instigateurs des assassins des Princes, iustifieront ils pas à tousiours que mes loüanges autant iustes que veritables, ne scauroient esgaller vos merites? Il n'est pas temps de se laisser me-
 bien ayez; Faut s'apprester plustost contre les coups du vent & de la tormente, dont ceste nuee rouge noire s'esleuant du costé de Midy, me menace. Vous avez veu d'autres orages, ceux cy ne peuvent vous effrayer; Ceste action de courage & de dexterité que requiert de vous le peril extreme de ma Nef, ja fracassée par la violence des ondes, va Couronner de perfection, plustost diuine qu'humaine, vos tant renommes experiences passées. L'une de vos mains doncques au timon. L'autre à l'escoure, vostre bouffole à son droict point, & vos yeux tousiours au Pole; Vente le vent d'Espagne ou de Rome tant qu'il voudra; que les frins de l'Océan estriuent de leur hauteur avec ma hune, si esperay-je nonostant, de surgir à bon port sous vostre sage conduite, accompagnée de la faueur du Ciel.

A l'ayde, mes fidelles François, à l'ayde. Vous qui ne participez non plus à la corruption de vos mauuais freres, quoy qu'habitez au milieu d'eux, que le poisson viuant en la mer, se sent de salure d'icelle; çà venez tost au secours de ces iustement genereuses, & genereusement iustes ames. C'est pour vostre conseruation que vigoureusement elles trauaillent, il n'est pas iuste qu'à bras croisez & engourdis vous soyiez simples spectateurs de leur peines.

Si leurs voix ont assez de hardiesse respectueu-

se pour frapper l'oreille de nostre Roy : Vos vœux ne doiuent auoir mons de deuotion religieuses, pour demander & obtenir du Ciel l'effect de leurs iustes remonstrances.

Vous mes bons Princes, vous le residu de ma vertueuse Noblesse, vous mes gens d'Eglise Catholiques François, chacun à vostre tasche, pour d'une mesme espaule, releuer mes masts r'habiller mon cordage, mettre en estat ma sartie & mes voiles à bon vent : A fin de sortir promptement de ce Golphe & reprendre le droict fil de ma nauigation. Non vers Calais, non vers l'Espaigne ny aux costes de la Xaintonge, ains au Havre de grace, ou autre tel port des moins perilleux qu'on puisse rencontrer en mes terres.

Il ne me reste plus qu'à parler à mon Prince, pour luy dire vn dernier Adieu & l'aduertir auant ma fin des grands mal'heurs, que ie voy menacer mon peuple & sa Couronne. Ie viens donc à vous, & mon LOVYS que i'ayme plus que mon ame ! Non en habit somptueux, non à face riante, non avec discours de fard & desguisement, comme ceux qui vous charment & vous endorment à la façon de Dalila : Que si mon Adieu & mes presages ne vous viennent à gré, ie suis pourtant vostre France; Qui ayant mon interres conioinct avec le vostre, ne puis souffrir qu'avec vous, ny me perdre sans vous. Ie ne fus iamais desloyale, ore que i'aye esleué des enfans qui parmy les estrangers, men ont meschamment acquis le blasme. Ia ne m'aduienne de vous tromper, vous n'entenderez de moy que choses veritables. Ma robe noire & deschiree : Mes yeux haues & enfoncez : Ma face passe & descharnee : Mes sanglots

profundus & entre coupez , preschent assez haut mon dueil, prophetisent ma mort & expriment, sans parler les doloieuses angoisses de mon ame. Et tout cela mon Prince , pource que l'on vous porte au feu, au sang , au rouës , aux proscriptions, contre la meilleure partie de mes enfans , vos subiects plus fideles. Conseil des ieunes qui perdid Robohan & son Royaume, conseil des partisans d'Espagne, conseil des Iniguistes, de qui Rauillac tenoit son meurtrissant couteau, & la damnable resolution qui m'a mortellement nauree par le costé du grand Henry, le defunct pere de vostre Majesté & de mon peuple. Peuple que vous allez tantost voir ô mon Prince abandonner les Villes, chercher la mort par les champs, & leurs tombeaux dans les ondes, où dans les ventres des Loups, des Ours, ou des Corbeaux, & semblables animaux charopiers & carminores. Ce sera lors que les veufues dont les maris, les orphelins dõt les enfens, auront porté le choc de vos cruelles armes, viendront a grosses troupes vers vostre Majesté, pour obtenir fauorablement d'elle, non la vie (don digne d'un grand Prince) ains vne prompte mort qui mette fin à leurs extremes miseres, mille fois plus insupportable que la mort. Ne pensez plus de voir mes fertiles campagnes, iaunissantes de l'Or de Cerez, ondoyer en la saison, ainsi que l'Ocean frisé par les hallenes de quelques doax zephir. Non mon Prince, vous ne les verrez qu'herissez d'espines & de chardons.

Marques certaines de la malediction diuine. Et si elles sont labourees, ce sera seulement pour enter-
rer les corps morts, afin que les viuans ne soient infectez de leur pourriturre. Encore ne croy-ie pas
qu'il

qu'il se trouue assez de terre pour cest vsage. Ne me demandez plus alors de Tailles: plus d'imposts, de tributs ou de peages. Cela s'appelleroit chercher de l'huile dans vn caillou: Ains disposez vous à bonne heure mon Prince, à vne temperance forcee, & à la pauureté. Sinon que faciez rendre gorge à vos espouges, en les pressans vn peu. Mais encor seront elles tost espuisées. Ce ne sont pas sources viues, comme vostre peuple, ce sont mares où eaux dormantes, sans autres source que la vostre. Laquelle venant à tarir, il faut de toute necessité qu'elles demeurent assechées. Que deuiendra lors le lustre esclatant de vostre Majesté, rauissant en admiration tout l'Europe? Triste spectacle de Cræsus estre changé en Irus, miracle, qu'un Roy de France soit reduict à l'extreme necessité, ineuitable toutesfois par la ruine de son peuple. Alors ne se verra plus ce grand & tant renommé commerce que mes marchands & commissionnaires font par toutes les terres habitées de ce grand Vniuers: seules & seures Mines cependant, qui rapportent plus de Finances, sans peine & sans peril dedans vos coffres; que ne sont celles du Perou à l'Espagnol vostre beau Pere. On traffiquera voirement: mais ce sera en hommes & en ames, comme les Tartares, & les Diabes, l'enfant vendra son pere, le pere l'enfant, la femme le mary, & le mary la femme. Cruauté contre nature, appannage certain de toute guerre ciuille pour le faict de Religion. Vous mesmes serez contrainct à mon Prince si auez de quoy le faire, & si la gabelle y peut fournir dont on vous facilite l'establissement en Guyenne, Par la prinse de la Rochelle, qui seule empesche l'execution de ce dessein pernicious: c'est

à dire, (si vous auez vne fois bien pratiqué ce tant sage conseil des Alchimistes de reduire tout en rien, & vous auez fait descendre le Soleil sur le coupeau de mes hautes montaignes, qui vous produise & engendre dans le ventre d'icelles toute abondance d'or & d'argent) vous serez contrainct, dis-je, lors d'acheter des Irlandois ou autres nations estrangeres pour faire habiter vos Prouinces despeuplees de naturels habitans par la violance de vos armes. Et combien pensez vous mon religieux Prince, qu'il se vendra de milliers d'ames, pour l'exécution de l'impie conseil que l'on vous donne ? & combien de charge par consequent à la vostre qui se rendra coupable de la perte de celles la ? O que ie suis affligé que ces desloyaux Conseillers ennemis de vostre gloire autant que de mon repos, vous vont embler & faire perdre le nom de Iuste, par vous si iustement acquis : pour vous endonner qu'elqu'autre, qui contente leur malice, des-honore vostre Majesté, vnique but auquel ils tendent. Scachez d'ailleurs, mon Prince, que ceux qui vous conseillent ainsi la desolation de vostre Monarchie esperent de la gagner apres que vous l'aurez perduë, les partages des Prouinces sont desia faictes. Vous auez payé descouragees ceux qui estoient à iuste tiltre mescontente d'en voir vn seul content pres de vostre personne ; l'expédition du Pont d'Essé leur à esté deffauorable, mais ie ne scay si vous les pourrez contenter cy-apres des deux tiers de vostre Couronne, en reseruant le tiers pour vous. Vne chose scay-je bien qu'il n'y aura si petit Capitaine, qui ne face du grand Seigneur : Seigneur qui ne tranche du Prince : Prince qui ne soit Roy. Ainsi accomplira vostre loyal Conseil, le desir de vos

aduersaires, les souhaits de mes ennemis. Pour lesquels empescher iusqu'à ceste heure, i'ay perdu tant d'enfans, i'ay tant souffert des peines, i'ay salué de si pres le tombeau. Ià dés long temps mon poulmon, & autres parties nobles toutes essechees, ne font qu'auéc vn sanglant trauail, les fonctions de la vie: Mes membres exterieurs sont rous couuerts de malignes vlceres, si de nouveau mes peccantes humeurs sont irritées, tout va fondre, tout se va rendre sur ces parties debilles, & puis ma fin.

Il n'y a remede, à quel prix que ce soit, il faut faire la guerre aux Heretiques, pour restablir l'Eglise Catholique en son lustre premier. Et n'est à regretter le Royaume de France, si en le perdant vous pouuez gagner le Celeste, mais bien loin de cela, SIRE, nul hazard en ceste entreprise, trois matinees la termineront. Ie ne m'estonne pas mon Prince, si par tels discours on pipe vostre Majesté, qui n'a veu les guerres passees, pour croiser de faux ces sornettes: Puis qu'à Henry III. dont les yeux estoient tesmoins du contraire, les Liguez de son temps osoient bien neantmoins, sans honte aucune & sans front, tenir mesme langage, pour l'engager à semblables resolution. Il resista longuement & par raison d'Estat, & par celles de la conscience: Mais il fallut en fin ceder à la force: Le Conseil en auoit esté prins à Rome & en Espagne, il ne restoit qu'à l'executer dans la France. On faict donc passer le Rubicon à ce Prince, ceste guerre commence, & ne finit pas si tost. Tout mon decrepite corps tremousse, mes blancs cheueux se dressent sur mon chef, ma voix tremblante, dont le premier organe est tout bouché d'espouuement & d'horreur ne peut sortir de ma bouche; Quand

ie porte mon souuenir sur les accidens plus que malheureux & deplorables, dont ce dessein infernal fut suiuy. Et tant plus, mon Prince, mon cher LOVYS, mon cœur & mon ame, me trouué-ie en ceste mortelle transe; Que de causes semblables, i'apprehende pareils effects. O Dieu seul auteur & conseruateur de mon estre, m'auriez vous bien fait de descendre en c'est aage tout accablé d'annees & d'ennuis, pour me faire souffrir de nouveaux supplices, sous lesquels ma plus vigoureuse & robuste ieu- nesse eust succombé sans ressource? me priueriez- vous pas plustost & de veuë & de vie, que non pas que ie voye, pour la troisieme fois les Enfers sans Demons, & mon corps en vn Enfer où tous ces trois esprits malins, se surmontans eux mesmes en rage & cruauté, assassinent mes Roys, sacrifient mon peuple à la fureur des armes, renuersent la nature, par le violement de tout droit diuin & humain, poluent tout mon corps d'infametez qui ne se peuuent dire, introduisent leurs autels dans mes temples, repur- gez de leurs abominations depuis plusieurs anne- es, & facent de mon estat vn espouventable Theatre, où se iouieront les plus sanglantes Tragedies que le monde ayt iamais veu, & que l'Enfer ayt basti en tous les precedens siecles? Helas mes delices, mon tout, pour qui tant de iustes apprehensions me tra- uail- lent, souuenez-vous de leurs paroles persua- si- ues, & penetrantes iusques à l'ame; Ils font bon marché du Ciel. Moyennant qu'ils puissent gagner les Royaumes de la terre, iusqu'à maintenant ils n'ont peu faire c'est eschange à leur aduantage; Et quoy qu'ils ayent porté mes deux Henrys dans le Ciel, sur la pointe de leurs assassins glaui- es; Ce non-

ostant, ie suis tousiours demeuree par grace speciale du Ciel, entre les mains de mes naturels & legitimes Monarques. C'est la geine, & la Croix des ces Demons, c'est la furie qui les agite, Car araignees infames, & viperes ingrattes qu'ils sont, ils conuertissent en poison contre leur mere, le bien que Dieu luy faict en sa faueur, de rompre les toilles qu'ils luy tendent, & d'empescher l'ouuerture du flanc qu'ils luy procurent. On vous trompe aussi mon Prince, de vous faire la ruine des Huguenots si facile; Toutes mes forces pendant ma phrenesie, y ont esté cy-deuant consumees; l'Espagne y a perdu son Or & ses pratiques; Rome & sa Sainteté, le Latin de leurs Bulles; Tout le monde à couru à grand haste, pour se trouuer à la deffaite de ses pauvres miserables: Cependant on n'a peu auancer vn seul pas encore, sinon en reculant. C'est tout autre chose, ô mon Prince, que la desroute du Pont d'Esse, & trouuerez en fin veritable la conclusion prophetique de Henry III. en la harangue qu'il fit à Messieurs de Paris, au Parlement, & aux Ecclesiastiques qu'en l'an 1585. il auoit assemblez dans le Louure. *Il eust mieux vally me croire (dict ce sage Prince) i'ay grand peur qu'en voulant perdre le Presche, nous ne hazardions fort la Messe; il vaudroit mieux faire la paix. Encor ne scay-ie pas, s'ils la voudront recevoir à nostre heure.*

Esleuez vous doncques, mon Prince, par dessus la dissimulation de ces mauuais Conseillers vos ennemis, ne cherchez point la verité ny la fidelité dans la passion qu'ils ont à la subuersion de vostre Empire; Prenez conseil principalement de Dieu & de vostre ame; Scachez si ceux contre lesquels ils vous animent, ne sont point vos fidelles & obeissans sub-

iects & seruiteurs ; S'ils adorent qu'un seul Dieu par un seul Iesus-Christ, s'ils ne font point en un mot profession du saint Euangile. Que si tout cela se trouue veritable, pourquoy les persecuteriez vous ; Or vous importe-il grandement de l'apprendre (mais d'autres que de ceux qui leur sont parties formelles) de peur qu'en les faisant mourir sans cause, vous ne soyiez trouué faire la guerre à Dieu à son Christ, & à sa diuine parole ; ce que les plus puissans Monarques de la terre n'ont iamais entrepris sans y laisser leur Couronne & leur vie.

Et puis les ames & les consciences ne se peuuent forcer, elles se moquent du fer, des gibets & des flammes. Craignans tant seulement celuy qui peut les tourmenter sans fin & sans mesure, au siecle d'Eternité. La puissance du fils de Dieu nous est assez connue, puis que le Ciel & la terre en sont les effets ; Doubter de son affection enuers nous, & au bien de son Eglise, seroit estre infidele. A il bien employé cependant le glaive ou la force des armes, pour amener les ames à soy ? Au contraire il n'a pas voulu que les armes entreprissent sur le regne de sa parole. Cela est bon à Mahomet d'ainsi le pratiquer ; Il se disoit tres-grand Prophete enuoyé de Dieu, pour foacer par la violence des armes, ceux qui n'auroient voulu se ranger, sous la puissance de Dieu par la predication de sa parole : Et qu'à ces fins, Dieu luy auoit enuoyé trois clefs, de la Iustice, de Prophetie & de Victoire. A Dieu ne plaise, ô mon Prince, que vous soyiez imitateur d'un si detestable Monstre, maudits soient à iamais ceux qui vous le conseilloyent. Laissez doncques Dieu par dessus vous, laissez luy & sa parole, le regime des consciences : Il n'y a point de

religion en la force. Que ce pretexte des coniurez ne vous porte point aux extremes, pour destruire par feu & par sang vos Citez plus loyales, vos plus fideles subjects: Qu'on ne me die point que c'est pour crime de rebellion qu'on les attaque: Cela s'appelle vouloir couvrir vn sanguinaire dessein: Mais d'une couuerture de cresppe, à trauers laquelle paroissoit clairement les choses qu'on y cache. C'estoit l'accusation des Iuifs meschans contre Paul & Silas Apostre, apres qu'ils eurent chassé l'esprit de Pithon, du corps d'une pauvre seruante. Ses Maistres en estoient marris, pource que leur esperance du grand profit de ses deuinements estoit perdue. Et ceux-cy craignent, que si la Religion des Huguenots s'aduançe, leurs affaires ne se reculent, leurs reuenus ne diminuent: Et que l'esprit du Vatican estant chassé, le deuinement des choses qui se font en l'autre monde, ne soit plus de requeste & de mise. A quoy sa Saincteté, & ses principaux Officiers les Inquistes, feroient vne notable perte. D'ailleurs mon Prince, Rome voit bien, que tant que ceste Religion subsistera dans mon Estat, vostre Couronne ne peut estre sous-mise à la Thiare de son Pontife. Les pauvres Huguenots sont trop fideles & passionnez à vostre seruice, pour l'endurer. L'Espagnol perd aussi l'esperance d'auoir ses franchises dedans mon sein, si ces Reformez ne luy font place, il ne peut les auoir à coups de pistolles, elles luy font faut feu: Faut donc que par ressorts secrets il face iouïr contr'eux vostre Royale espee.: C'est à dire en bon françois, qu'il vous batte & vous vainque de vos propres armes: Les siennes n'estans d'assez forte trempe pour en venir à bout. Il y va d'au-

tre part du total interest des Potirons de la fortune ; enyurez de vos faueurs , qui ne peuuent estre asseurez en leur grandeur ephemere : Si des deux Religions de mes enfans , l'vne n'est tost aneantie. Car ils se craignent tousiours , que ceux qui ne peuuent souffrir d'estre abaissiez par leur esleuement sans mesure : Ni reculez de vos faueurs par leur approche sans milieu : Se ioignent à l'vn des deux partis , pour contre-carrer leur grandeur , & troubler ainsi la feste solemnelle de leurs prosperitez , par le lugubre de quelque *Miserere*. Et si mes Huguenots eussent voulu prester leur oreille & leurs mains , pour ouyr & executer ce à quoy on les appelloit a ces dernieres faillies , la besongne seroit ia faicte : Ne seroit plus mention de la faueur : Mais au contraire , ô mon Prince , ils sont demeurez collez à vostre personne & seruice , ils y ont porté leurs vies & leurs biens : Auec autant de fidelité que de promptitude de courage. Fault-il pour toute recompence les payer de la monnoye du Loup d'Esope ? Et beuuans au dessus de la faueur & de ses restes , troubleroyent-ils bien l'eau dont à longt traits elle s'abbreue ? On le veut pourtant croire. C'est la rebellion qu'ils ont commise , d'autre , ie n'en sçache point , ô mon LOVYS. Que s'ils vous estoient rebelles : Ie les chastiroy comme mere , ne les souffriroy plus dans ma maison , & leur desniroy pour iamaïs tout aliment & nourriture.

Mais on appelle rebellion , lors qu'ils s'assemblent sur la promesse qu'on dict que vostre Majesté leur en auoit donnée : Pour par commune voix & suffrages , vous presenter avec tout respect & submission , leurs supplications tres-humbles : A ce qu'il vous

vous plaise ouyr leurs plainctes auant que de condamner leur causes & leurs personnes. Ils ne cherchent point d'autres armes que leurs l'armes, s'il plaist a vostre bonté Royale y auoir quelque esgard : Vous estes Louys le iuste, oyez-les donc, auant que de les destruire. Si vous portez en l'vne de vos mains le glaue, aussi auez vous en l'autre celle de la Iustice. C'est l'ornement du Sceptre d'Or de tous mes Roys depuis vnze cens ans & d'auantage. Consideréz que ceste main qui faict la poincte de vostre Sceptre, est d'yuoire tres-blanc & bien poly. D'yuoire, pource que l'Elephant entre tous les animaux de la terre, est le plus iuste. Blanc, pource que la blancheur est le symbole de la beauté, de pureté & de liesse, qualitez inseparables de la Iustice. Le Sceptre donc est vostre force, la main d'yuoire vostre Iustice, gouuernement admirable quand la puissance & la Iustice s'y rencontrent. Car la Iustice compagne de la Majesté, c'est comme vn Roy que la Royne accompagne, vestu de ses plus illustres ornements. Ainsi disoit on, que Dieu se promenoit par toute la Nature, accompagné de la Iustice. Dion de Nice accompare le Roy au Pilote de Nauire; Cestuy cy contemple tousiours le Ciel, pour y voir le North & les Estoilles qui le guident; Iette aussi sa veuë sur les eaux pour euitier les escueils & les sables. Cestuy là d'vne ame sainctement religieuse conuerse avecque Dieu; D'vn œil tout iuste void les agitations & diuers mouuements de son peuple. Les modere, les regle au compas de la raison. Les pese d'vne iuste balance, pour euitier le naufrage & le desbris ineuitable aux Estats ou ne regne qu'iniustice.

Vous estes l'Image de Dieu, Dieu ne ferme iamais

les oreilles à ceux qui les reclament, les Temples des
 diuinitez Payennes estoient ouuerts iour & nuict,
 afin qu'à toute heure & momens, ceux qui vou-
 droient y recourir, peussent y auoir entree. L'hum-
 ité de la priere accompagnée d'ardeur à souuent arra-
 ché des mains du tout Puissant les foudres qu'il y re-
 noit, pour poudroyer les ames criminelles : & vous
 mon Prince, demureriez vous inflexible à mes in-
 nocentes, humbles, & passionnees supplications,
 & à celles de mes enfans que la necessité & la crain-
 te de vostre fureur rend seulement coupables d'une
 importunité suppliante : Ne prenez vn conseil si re-
 pugnant à la douceur de vostre nature. Les Priuces
 d'Ethiopie laissoient au dessus de leur Throsne, dou-
 ze chaines pour les Anges, qu'ils desiroient presider
 en leurs deliberations plus importantes & serieuses :
 Que l'Ange du grand Conseil, vous conseille, non
 pas ces Demons incarnez, qui assiegent vostre per-
 sonne, capriuent vostre volonté, & tiennent de for-
 ce vostre main, pour rendre executrice de leur ra-
 ge infernalle contre les innocens. Opposez à leurs
 suggestions, ô mon Prince vostre pieté, vostre fea-
 ble iustice, & la fermeté de vostre Royale parole;
 Alexample du grand Henry de tres glorieuse me-
 moire, geniteur de vostre Majesté. Ce Prince sans
 autre second que vous, SIRE, au discours qu'il fit
 aux principaux de son Parlement, sur la verification
 de l'Edict de Mantes, parle en ses termes, ainsi que
 l'histoire le rapporte. *Je ne trouue pas bon (dict ce bon
 Prince) d'auoir vne chose en l'intention, & escrire l'au-
 tre; Et si quelques autres l'ont fait, ie ne le veux pas faire
 comme eux, la tromperie est par tout odieuse mais elle l'est
 d'auantage aux Princes, dont la parole doit estre immuable*

Ce sont paroles graues & sententieuses, vrayement dignes d'un si grand Roy. A la pratique desquelles, m'assure que vostre Majesté ne manquera non plus qu'à l'effect de la declaration qu'elle fit à son aduenement à la Couronne, en faueur de mes pauvres enfans qu'on veut maintenant rendre criminels de leze Majesté Diuine & Humaine. Declaration qui conçue en termes de bien veillance, de verité, & de Iustice, à depuis par vostre Majesté à diuerses fois esté confirmée, mesme de fraische datte, par les assurances qu'il vous en a pleu donner à leur Assemblée tenant à Loudun par vostre concession fauorable. Or les paroles des Roys doiuent estre oracles en certitude: Et d'une trempe si forte que rien ne les puisse faulcer. Ains comme Dieu par sa diuine Parole à donné au Ciel & à la terre leur existence: & par ceste mesme parole les soustient; Au cas pareil les Monarques donnans leur serment à Dieu en leur Sacre, de consacrer toute leur grandeur à sa gloire & au salut du peuple; Et promettant au peuple lors de l'establisement de leurs Monarchies, d'employer iusqu'à leur vie pour la conseruation du peuple, & le bien de l'Estat; doiuent par l'immuable fermeté de ses religieuses promesses, & de toutes les autres qu'ils donnent, fondées sur iustice & raison, maintenir l'honneur de Dieu: Garantir de violence le peuple, de ruine l'Estat, & de flestrisseure leurs Couronnes.

Quoy, mon Prince, quand on calomnie ces pauvres Reformez, ils recourent à vous comme protecteur de leur innocence: Quand on les persecute, vous estes leur retraite: Quand on attente sur leurs vies, ils vous en recognoissent le garant. Dire au partir de là que le protecteur des innocens les vueille

fouller : Que la retraite des persecutez les vueille
 affliger : Que le garant de leur vie , la leur vueille ra-
 uir : que la langue la plus disette de l'Vniuers , s'ef-
 force de persuader cela aux Canniballes , pour voir
 s'il le croiront ? Et mes enfans vos subjects destinez
 à l'occasion par Esaü leur frere : Croiroient-ils que ce
 fut du consentement & par approbation de vostre
 authorité , Royale & paternelle tout ensemble : Cela
 ne peut monter en leur pensée. Plustost ils disent ,
 que vous estant leur pere , les iniustices qui leur sont
 faiçtes reiaillissent sur vostre Majesté que leurs ne-
 cessitez la touchent. On à beau vser de menaces (car
 de discours raisonné , on en daigneroit employer en
 leur endroit.) On à beau leur dire qu'ils perdent &
 le temps & leurs peines : Si ne cesserois-ils iamais de
 renouueller leurs supplications tres.humbles , &
 reïterer leurs plaintiues remonstrances à vostre Ma-
 jesté : Et comme fideles Mardochees seront tousiours
 à la porte de vostre Louure , pour descouoir les san-
 glantes conspirations , qu'on brasse journellement
 contre l'Estat de vostre sacree personne. Iusqu'à ce
 que le Ciel leur estant fauorable , change leur som-
 bre nuict au serain de quelque beau iour , qui excite
 en l'ame de vostre Majesté , le loüable desir d'ap-
 prendre , dans l'Histoire , fille de Verité , lumiere de
 la vie , registre des sages Conseils , & resueille-matin
 des Princes : Quels d'entre vos subjects ont esté de
 tout temps plus fideles à la Couronne , quels ont at-
 tenté sur l'Estat & sur la personne de vos predeces-
 seurs , entre lesquels à esté frappé le dernier (ie pasme
 en le disant) mon grand Henry de triomphante me-
 moire , pere de vostre Majesté : Et lors ils s'asseurent
 que par la cognoissance que vous aurez de leur in-

corruptible fidelité, & affection très-ardente au ser-
uice de leur Prince : Vous changerez leurs supplices
en bien-faits : Et la grandeur des Amans de vostre
Cour, en l'exaltation par eux meritée, du giber qu'ils
auoient préparé contre l'innocence des mardochees.

Je ne sçay si mes discours vous ennuyent (ô mon
LOVYS le Iuste, à qui ie procure aussi le tiltre de
debonnaire, afin qu'en l'un & en l'autre, vous ensui-
uiez le vray Dieu, puis qu'en estes la viue image)
Mais eusse-ie pas esté desloyale & desnaturée, si pre-
uoyant les coups dont vostre teste & celle de mon
peuple sont menacées, ie n'eusse rompu mon silen-
ce, pour m'escrier. N'offencez pas le Roy mon pere,
ne meurtrissez pas mes enfans ses subjects : & pour
vous instruire salutairement aussi, des choses que
l'experience de tant de siecles passez, & la cognois-
sance du present, m'ont à mes despens apprinses.
Que si mes discours ont trouué de la creance en vo-
stre ame, c'est l'accomplissement de mes souhaits : si
du contraire, vous les reiettez comme inutiles, &
continuez au dessein d'employer le fer contre les
membres plus sains que i'aye, tranchez le cours de
ma vie auant que i'acheue ce discours. Arrachez
moy les yeux plustost que ie reuoye dans mon corps
tant de confusions infernales : Commencez par
moy le carnage, & que ie ne suruiure plus à mes tres-
chers enfans. Je vous pardonne, ô mon fils & mon
Prince, puis que donnant fin à mes iours, vous met-
rez aussi fin à mes miseres presentes, & à celles qui
sont à venir, beaucoup plus cruelles encore. Aussi
suis ie lasse de viure, mon corps chargé d'années,
n'est rien qu'ennuy, rien que pesanteur à soy-mes-
me. Il y à peu de Monarchies qui aillent du pair a-

uec moy en durée de siecles : Rien de constant & de perdurable en ce monde , la mort seule , est le partage asseuré de toutes choses sub-lunaires. Il faut que ie finisse puis que i'ay commencé , les presages de mon dernier malheur me pressent. Ià des long temps on ne me nourrit que d'Alluyne , cause de mes ameres douleurs. Ie n'habite que sous des Brandes , Marque de ma paureté n'ompareille , ie suis reduitte à la choisne , seruitude insupportable à celle qui toute sa vie à esté franche : On cueille en verd mes esperances , ainsi ne me restent que crainctes. Crainctes , non pour moy , à qui rien de pis ne peut arriuer que ma durée , rien de meilleur que la mort : Mais pour vous ô mon Prince , qui m'ayant par vn tres-mauuais conseil esconduite de mes iustes demandes , aurez ce repentir eternal dedans l'ame d'auoir aduancé le dernier iour de la France mourante , vestre mere. Et qui pis est (ie meurs en le disant , & ce sont icy les dernieres paroles que vous orrez de ma bouche) procuré vostre ruine propre , & celle de tout mon peuple , Vos tres-humbles subjects & seruiteurs.

Morientis vox sacra.

36 1/2 yds 1000
37 1/2 yds 1000
38 1/2 yds 1000
39 1/2 yds 1000
40 1/2 yds 1000
41 1/2 yds 1000
42 1/2 yds 1000
43 1/2 yds 1000
44 1/2 yds 1000
45 1/2 yds 1000
46 1/2 yds 1000
47 1/2 yds 1000
48 1/2 yds 1000
49 1/2 yds 1000
50 1/2 yds 1000
51 1/2 yds 1000
52 1/2 yds 1000
53 1/2 yds 1000
54 1/2 yds 1000
55 1/2 yds 1000
56 1/2 yds 1000
57 1/2 yds 1000
58 1/2 yds 1000
59 1/2 yds 1000
60 1/2 yds 1000
61 1/2 yds 1000
62 1/2 yds 1000
63 1/2 yds 1000
64 1/2 yds 1000
65 1/2 yds 1000
66 1/2 yds 1000
67 1/2 yds 1000
68 1/2 yds 1000
69 1/2 yds 1000
70 1/2 yds 1000
71 1/2 yds 1000
72 1/2 yds 1000
73 1/2 yds 1000
74 1/2 yds 1000
75 1/2 yds 1000
76 1/2 yds 1000
77 1/2 yds 1000
78 1/2 yds 1000
79 1/2 yds 1000
80 1/2 yds 1000
81 1/2 yds 1000
82 1/2 yds 1000
83 1/2 yds 1000
84 1/2 yds 1000
85 1/2 yds 1000
86 1/2 yds 1000
87 1/2 yds 1000
88 1/2 yds 1000
89 1/2 yds 1000
90 1/2 yds 1000
91 1/2 yds 1000
92 1/2 yds 1000
93 1/2 yds 1000
94 1/2 yds 1000
95 1/2 yds 1000
96 1/2 yds 1000
97 1/2 yds 1000
98 1/2 yds 1000
99 1/2 yds 1000
100 1/2 yds 1000

